

Datum: 14.03.2023

Autor: Martin Gabriel



La PPS ha preschentà sias diesch candidaturas

MARTIN GABRIEL/ FMR

Magdalena Martullo-Blocher e Thomas Roffler èn sin ils emprims plazs da las duas glistas d'elecziun da la Partida populara svizra (PPS) dal Grischun per las tschernas dal Cussegl naziunal da l'atun proxim. La PPS chantunala ha preschentà glindesdi a Cuira lur candidatas e candidats e lur finamiras per las proximas elecziuns.

La glista cun il num «Power» sa drizza a l'economia e la glista «Purs» a l'agricultura. Tenor il president da la PPS dal Grischun *Roman Hug* èn l'economia e l'agricultura ils temas, als quals la PPS dal Grischun vuless dar prioritad en il cumbat electoral. «Nossa finamira è plinavant da defender la posiziun sco partida la pli ferma ed impedir ch'i dettia ina maioritad sanestra/verda.»

Quatter dunnas e sis umens

Sin la glista «Power» candideschon interprendidras ed interprendiders. Sper la cussegliera naziunala *Magdalena Martullo-Blocher*, en uffizi dapi l'onn 2015, candideschon ils quatter deputads *Sandra Adank* da Cuira, *Gabriela Menghini-Inauen* da Poschiavo, *Roman Hug* da Trimmis e *Ronny Krättli* da Domat. Sin la glista «Purs» è il president da l'Uniuin purila grischuna,



La glista «Power.» Da san: *Roman Krättli*, *Magdalena Martullo*, *Sandra Adank*, *Gabriela Menghini-Inauen* e *Roman Hug*.

Thomas Roffler, sin l'emprim plaz. Ulteriurs candidats e candidatas èn *Walter Grass* d'Urmein, *Gabriella Binkert Becchetti* da la Val Müstair, *Benjamin Hefti* da Zezas e *Martin Sgier* da Surin.



La glista «Purs.» Da san: *Walter Grass*, *Martin Sgier*, *Benjamin Hefti*, *Gabriella Binkert Becchetti* e *Thomas Roffler*.

FOTOS MARTIN GABRIEL

Ina strategia sin dus binaris

Il mund da la lavur, en spezial l'augment da taglias e taxas, la stgarsezza dal spazi d'abitar, il provediment d'energia insufficient ed adina pli char, la mancanza da forzas da lavur e la burocrazia, quai èn ils accents da la glista «Power». La glista «Purs» è ina glista da lobi per l'agricultura cunter la politica d'agricultura da las partidas sanestras. Bleras politicras e politichers sanesters hajan pli gugent ils lufs che las vartgas sin las alps, han ils represchentsants manegià glindesdi a Cuira. La nominaziun ufiziala da las candidatas e dals candidats fa la partida ils 23 da mars a Cuira.

PPS quinta cun in'allianza burgaisa

La PPS dal Grischun è en tractativas per furmar in'allianza d'elecziun burgaisa cun la PLD dal Grischun e cun cun l'AdC dal Grischun. Quai na saja nagut da nov, ha la gestiun da la campagna electorala ditg en occasiun da la preschentaziun da las candidaturas. Ed il president dalla PPS, *Roman Hug* ha confermà envers la FMR ch'ils discurs per in'allianza burgaisa sajan fitg positivs en fin qua.